



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

14 Abril 2016

Komunikadu Imprensa

Parlamentu Nasional

Rekomendasaun JSMP kona-ba Proposta Lei Prosedimentu Konsesaun Indultu hetan konsiderasaun hosi Parlamentu Nasional

Iha loron 11 Abril, tinan 2015, Parlamentu Nasional (PN) liuhosi reuniaun plenária halo diskusaun no aprovasaun iha esesialidade no finál global ba Proposta Lei n.º 27/III (3ª) kona-ba *Procedimento de Concessão de Indulto e comutação de pena*. Proposta Lei ne'e sei serve hanesan mekanismu propriu ida atu fasilita prosesu konsensaun indultu no komutasaun ba pena iha prátika ezerosiu kompeténsia Prezidensiál kona-ba indultu.

Durante plenáriu deputadu Antoninho Bianco kestiona makas kona-ba provizaun umanitariu ne'ebé inklui iha Proposta Lei indultu hanesan fundamentu ida atu hetan indultu. Dalabarak iha prátika iha tendénsia atu manipula informasaun relasiona ho kondenadu sira nia estadu médiku ne'ebé fornese hosi tékniku sira atu fasilita sira asesu ba direitu indultu ka komutasaun ba pena ne'ebé bele prejudika Prezidenté nia kribilidade rasik.

Hatan ba preukupasaun ne'e, Ministru Justisa hatuir katak nia konsidera katak kestaun sira ne'ebé deputadu sira foti ne'e iha razaun tuir interpretasaun deputadu ida-idak nian. Maibé importante liu atu kompriende lei ne'e bele ona atu respoden preukupasaun sira ne'ebé mak deputadu sira levanta ona iha leten. Ministru Justisa reforsa liutan katak artigu hirak ne'ebé define iha lei ne'e koresponde ona deputadu sira nia preukupasaun sobre prátika implementasaun servisu nian tuir kna'ar ne'ebé lei ne'e fó. Liu-liu iha artigu 9 Proposta Lei ne'e antisipa kedas ona kuandu iha iregularidade ruma akontese durante prosesu fó indultu no komutasaun ba pena.

Aleinde ne'e deputada Carmelita C. Moniz mós akresenta tan katak revogasaun tuir lei ne'e relevante, tanbá antes ne'e, JSMP levanta kona-ba kondenadu balun ne'ebé tuir loloos la iha direitu atu hetan indultu maibé iha momentu ne'ebá sira simu tiha indultu hosi Prezidenté.

“JSMP apresia esforsu hosi Parlamentu ho Governu hodi hatan ba preukupasaun públiku nian durante ne'e kona-ba prosedimentu fó indultu. JSMP fiar katak wainhira Prezidenté públika ona lei ne'e sei fasilita Prezidenté atu ezerse nia kompeténsia iha maneira ida-ne'ebé apropiadu liu no evita prátika sira ne'ebé dalaruma hamosu kontráversiu no polemiku ne'ebé la nesariu iha comunidade, dehan Diretór Ezekutivu JSMP Luis de Oliveira Sampaio.

JSMP apresia ho deputadu sira nia konsiderasaun hodi inklui rekomendasaun JSMP iha lei refere hanesan regula ona iha artigu 2 kona-ba nia efeitu, artigu 3 kona-ba kriteriu konsesaun no artigu

4 kona-ba krimes *insuscetíveis de indulto* ka krime ne'ebé la hetan fatin ba indultu no komutasaun ba pena.

Rekomendasaun JSMP nian ne'ebe hetan konsiderasaun mak hanesan; defini klaramente termu sira konabá 'indultu' no 'hamenus sentensa', indultu no hamenus sentensa bele fó deit depois de prosesu julgamentu konklui ona, defini kona-ba moldura penál ne'ebé merese atu hetan indultu, inklui mós durasaun kumprimentu pena ne'ebé hala'o ona (ez. 1/3 hosi pena) no kondisaun saúde, idade, kondisaun familiar ne'ebe dependensia. Nun'e mós tipu krime sira hanesan krime kontra interese públiku, krime transnasiona, droga, tráfiiku umanu, brankamentu kapitál. Favor lee JSMP nia submisaun antes iha (<http://jsmp.tl/wp-content/uploads/2013/03/Paraser-kona-ba-Lei-Indultu-Presidensial-TETUM.pdf>.)

Proposta Lei ne'e governu prezenta ba Parlamentu Nasiona kompostu husi artigu 10. Mesmu nune'e, iha deliberasaun hosi Komisaun A, bazeia ba rekomendasaun husi audénsia ho intidades relevantes sira hotu tantu governu no sosiedade sivíl inklui JSMP rasik, Komisaun halo alterasaun ba nia titlu no artigu balun antes tama ba iha plenária atu halo diskusaun epesialidade iha finál global.

Proposta Lei Konsensaun Indultu ne'e aprova ho votus unanimidade husi total deputadus 46 ne'ebé prezenti no Komisaun A sei reformula fali nia redasaun finál antes hato'o ba Prezidenté da Repúblika atu promulga.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl